

四庫全書

集部

欽定四庫全書

江湖小集卷二十五

宋 陳起 編

何應龍橘潭詩稿

春寒

博山熏盡鷓鴣斑
羅帶同心不忍看
莫近欄干聽花雨
樓高無處著春寒

客懷

客懷處處不宜秋
秋到梧桐動客愁
想得故人無字到

鴈聲遠過夕陽樓

寫情

灑淚題春墨
暈乾東風無便寄
郎難青箱再展
雲牋看
蠹却相思字不完

寄胡雪江

借得官亭小
似船六橋風月友
三賢芙蓉未發
荷花老
一點詩情若箇邊

旅中示同輩

與君同出已多時
費盡囊金典盡衣
只待春江煙浪暖
小舟先趁白鷗歸

清曉

清曉輕傳一信風
花添紅粉草添茸
畫樓十二欄干曲
春在珠簾第幾重

筍

泥中莫怪出頭遲
歷盡冰霜祇自知
昨夜震雷轟渭畝
請君來此化龍枝

過垂虹

垂虹橋下水連天一帶青山落照邊三十六陂烟浦冷
鷺鷥飛上釣漁船

吳蠶

正是吳蠶出火時交交窗外一禽啼溪西有葉高難採
遙見青裙上竹梯

效香奩體

雲幙重重雨未收嫩寒先到玉簾鉤一杯晚酒無人共

羞帶雙花下小樓

木犀

露粟藏金一半開
層層碧玉映樓臺
西風昨夜吹香過
人在欄干待月來

夏日即事

野土生烟草樹焦
彤彤日脚火雲燒
池邊自拗青荷葉
吩咐山童蓋藥苗

題駱秀才葺故廬疏

家在西湖合澗橋短籬圍得數椽茅歸來頗費支撐力
羞見春風燕子巢

有別

樓上佳人唱渭城樓前楊柳識離情一聲未是難聽處
最是難聽第四聲

春詞

玉纖輕揭繡簾開行到花前淚滿腮正爾春心無處託
一雙蝴蝶忽飛來

有所思

曾倚空屏唱柳枝一聲嬌
逐暮雲低重來只見流鶯在
立盡斜陽不肯啼

小園

池占方方十丈寬已栽花木四時看
客來莫笑生涯薄
窗外新添竹數竿

為客

初秋為客暮秋歸一擔輕囊半是詩
試問客情何處惡

五更孤店酒醒時

東風

和徹詩篇得暫閑
落梅香裡立欄干
新裁白紵春衫薄
猶怯東風一陣寒

有所見

不著畫羅金縷衣
尋常打扮最相宜
春風燕子樓前過
飄落梨花雪一枝

曉窻

桃花落盡李花殘
女伴相期看牡丹
二十四番花信後
曉窻猶帶幾分寒

居家

居家到底勝居官
啼鳥聲中晝掩關
待得小園花落盡
更須移酒對青山

採蓮曲

採蓮時節懶勻粧
日到波心撥棹忙
莫向荷花深處去
荷花深處有鴛鴦

盆中四時木犀

一樹婆娑月裏栽是誰移種下天來
金英恰似清霄月
一度圓時一度開

相思

二月春風楊柳青
聞郎繫馬到長亭
相思情味如中酒
折盡梨花嗅不醒

江上有感

江上秋深客未歸
荻花楓葉兩依依
傷心最是長橋路

落日西風一鴈飛

見梅

雲遠前岡水遠村忽驚空谷有佳人
天寒日暮吹香去
盡是冰霜不是春

舟中偶成

黃帽招呼急下船
天明僅可過涵山
朦朦一枕梅花夢
猶在寒窻紙帳間

題臨安僦樓

過了燒燈望燕歸春寒剗地勒芳期杏花深巷無人賣
細雨空簾盡日垂

粉蝶

宿粉棲香樂最深暫依芳草避春禽晚來風起還無定
舞入梨花何處尋

活計

三間茅屋蓋頭顱除却吟篇事事無擬把十年窮活計
一時傾倒向江湖

無愁

世間惟我最無愁
纔是無愁得自由
午睡覺來門半掩
一池春水看魚遊

春陰

密雨流酥入翠苔
春陰日日鏤樓臺
女郎未有尋芳約
辜負櫻桃一半開

老翁

八十昂藏一老翁
得錢長是醉春風
杏花村酒家家好

莫向橋邊問牧童

清明

踏歌槌鼓近清明
小雨霏霏欲弄晴
喚起十年心上事
春風樓下賣花聲

杜鵑

君若思歸可便歸
故鄉祇在錦江西
不知何事留君住
却向空山日夜啼

贈友人

我向詩中為活計君於酒裡作生涯
世間樂事惟詩酒
各自風流占一家

簾

半窳香波護曲欄
纈花紅映玉鈎閑
曉來幾陣輕風過
時見溪南卷畫山

碧桃

玉僊同駕玉鸞飛
天上曾攀帶露枝
一片不知何處落
曉來流到湧金池

芍藥

金藥絲頭茜染成五雲樓映玉盤傾謝郎一入中書後

二十四橋空月明

傷春

荷葉初浮水上錢柳花飄盡岸頭綿不知春色歸何處
欲向空山問杜鵑

效無題體

玉釵風斷扇雲深砌冷簾空月易沉流水落花無處問

一年春事一年心

江湖小集卷二十五

欽定四庫全書

江湖小集卷二十六

宋 陳起 編

沈說庸齋小集

立秋

昨日午時秋西風夜轉頭吹來溪外雨藏却樹間樓
暝帶淒鷗色涼催客燕愁一樽吟未了衰鬢早颼颼

仁福道中

山徑少曾平人烟隔隴青淺流分石渡低樹礙輿行
稅

籍全編戶村童半壯丁
我來官此邑三度究民情

偶成

讀罷黃庭一卷經
磬殘煙冷夜壇清
月明何處人開戶
驚起松梢睡鶴鳴

征途

桂筦三千里
征人一寸心
自從登驛路
幾見換鄉音
古樹春陰薄
寒塘野水深
渴行呼得酒
瓦椀不辭斟

暮春

燕翼初乾淥滿地桑陰收盡麥黃時一年春事又成夢
幾日愁懷欲廢詩料理病身嘗藥遍揩摩睡眠看書遲
脩然獨倚闌干立花下狸奴卧弄兒

紙衾三首

碎搗霜藤月下砧清泉瀉出簞紋勻老翁採藥歸來晚
剪得山南半段雲

繭面新乾帶露揉春回斗帳伴吟愁殘年已辦蒙頭過
風雪從教打戍樓

一幅新裁碧澗冰
野人留客宿雲層
山房恰好松醪熟
夜半無眠話葛藤

春詞

水漲寒溝柳又陰
小窻風度一聲禽
若將離緒繫春事
片片飛花是客心

送何權院之官金陵

分司陪宰掾
賜勅帶朝銜
見說成行李
無因別去帆
秋風石城路
夜月雨花巖
料有驚人句
鴻邊寄短函

溪樓

心遠俗塵隔樓高野興多稻花黃雀雨山影白鷗波灘
澁推船上橋危挽客過日斜欄倚遍無句奈愁何

寄張永堂

浙江風浪濶夢不落吟邊書到知何日君歸想隔年才
高朝士重命拙故人憐早辦山中計吾今省俗緣

烟浦

烟浦殘鷓舞夕陽風枝病葉似初霜眼中秋色十分淨

沙外寒流一綫長
溪女得魚烹碎白
田家收穀曬新黃
偶尋野趣歸來晚
草際螢飛點點光

渠流

岸石濕黏萍一渠流水清
每來疑雨過少立見魚行樹
隔炎歎遠橋分午影平
主人契幽事客到出相迎

安石嶺

茅屋鷄聲勘夜分
杖藜挑月帶餘醺
不知身在孤峯頂
回首人家盡白雲

緡雲道中

去作京華客離家此月前問程恰中道數日近殘年山
雨易成雪村雲疑是煙僕行愁不進添乞去聲酒漿錢

次韻立方何園

春事覺垂垂春行似後期草根花片積人語鳥聲隨酒
病因過量棋輸為好奇欲歸愁路遠月色若為私

次韻永堂

鶯聲未改春葉底一蟬新幻境老無夢醉鄉詩有神整

巾因把鏡懶語怕逢人似此衰遲者勞君料理頻

古樹

古樹被青蘚蟠溪作卧龍窮冬不蔽日入夏却生風枝
少禽難託根空蟻聚封幸為斤斧棄得老雪霜中

買舟

租得舟如葉低低半搭篷僅堪容野客還喜友漁翁
水斜分浪懸崖逆鬪風去程應不計且泊槿花叢

明融盆池二首

涼入湘簾影半開
小窻午枕夢初回
蕭疎數葉秋菰上
也解聲聲報雨來

老瓦盆深漾細萍
雨多流却半瓣青
夜涼偶出庭心看
缺處光涵三兩星

聽雨

耳根聽不歇
滴滴冷於秋
疑是山翁醉巖前
枕瀑流

晚春

白頭何計是生涯
日日樽前卧落花
綠滿池塘無一夢

夜來風雨過誰家

贈段琴

我琴未絃時渾然心與耳自從識開指反為琴所使清
風千古曲雪澗敲寒玉誰能繼此音蒼梧泣修竹

食梅

兒時摘毒梅葉底尋彈丸所恨襟袖窄不憚頰舌穿我
年不自覺以我齒尚完嘗新試一薦喉棘眉先攢豈味
不悅口豈老難強餐人生煎百憂弄梅未為酸

秋詞

雨放涼颼晚復晴小窻人亦共秋清月華網在蛛絲上
錯認疎簾挂水晶

閨詞二首

密幄香燒錦瑟橫佳人半醉覺寒輕忽思塞下新番曲
彈作黃蘆孤鴈聲

冬事侵尋渾未知隔隣聽得理寒衣驚心步出庭西曲
日影斜斜木葉飛

馮公嶺

曉上馮公嶺艱難見客情
雨和殘葉落身逐亂雲行
野店山腰出秋泉石罅生
若將世途比此路更為平

山中秋興

山戶少曾扃居貧易得清
秋衣和月卧溪茗雜雲烹
學字書紅葉看騷些落英
從他頭早白心事本和平

別墅

野舍清溪曲連茅接樹陰
呼童隣錯應貫酒婦同斟
落

照收殘雨寒烟出寸岑
江湖成夢事投老屬山林

次韻古愚立冬日觀菊

閑繞籬頭看菊花
深黃淺紫自窠窠
清於簷蔔香尤耐
韻比猗蘭色更多
九節菴疑今日是一樽
未覺晚秋過
從教白髮須簪徧
且任當筵作笑歌

竹色

竹色留清睡
薰風畫一簾
懶因人事少
病覺老顏添
開檻臨昏鏡
齊書補墜籤
晚蟬聲欲斷
新月到虛簷

曉色

曉色闌干外，悠然一欠伸。
雨中無過鳥，煙際有行人。
樹濕清陰重，沙埤潦漲新。
憑誰借簟笠，整釣傍溪隣。

鄉溪途中

天風吹落日，秋色上遙岑。
倦客未投館，棲鷗已滿林。
妻孥非遠別，歲月易驚心。
市酒不成醉，新蛩助我吟。

雪

凍頂縮如龜，茅簷諷雪詩。
冷於初下日，好是未消時。
樹

重高枝折窻明晚色遲忽思溪上路擬借蹇驢騎

遊真巖

一逕入松林真巖峭莫尋山空泉自落日出地長陰鶴
去僊臺淨丹成古井深殘碑看未了屋角轉幽禽

送周堂長歸慈谿寄何贊府

慈溪隔楚雲問不接鴻鱗因送還鄉客重懷佐邑人海
明看出日山晚倦行春料得雙松下吟成瘦鶴身

超化雲山

入門松作逕步步接秋陰山帶孤城起雲歸古殿深隔
池聞鶴唳倚樹看僧吟笑指煎茶處青烟出竹林

題黃止庵詩集

燈前幾寒夜編得近詩成對客時評看歸囊喜帶行風
高霜鶻健木落澗秋清吟到無吟處蕭蕭白髮生

釣臺

山東江流起素湍羊裘立盡暮雲寒早知釣餌成虛設
多却當時一釣竿

西湖獨步

平湖開霽色寒碧照空心
小立背橋影緩行隨柳陰
幾年勞遠夢到日記曾吟
荷蕩成菱地蕭蕭秋意深

送何水竹需次入剡易齋赴浙漕

弟兄聯騎出秋色赴行裝
慈水瓜應熟孤山桂又香
對床村店寂起飯曉燈涼
到日分吳越江流兩岸長

南坡不以科目自累而以風雅自鳴請余為賦

鳳銜科詔出祥雲底事儒林有逸民
四海聲名難著我

一坡風月正宜人鏡留白髮非遮俗家釀黃柑可接春
只許詩朋自來往素袍青履華陽巾

鷄鳴

鷄鳴霜葉下月在紙窻寒客路千家曉山居一枕安秫
收催歲釀韭種接春盤縱有少年夢其如心事闌

寄永堂

落日照江東思君訊便風棲遲定何處約莫過殘冬小
隱時曾到安書久未通自憐心易老盤屈似寒松

送觀過免舉赴省

樽前逢臘近行李獨西征事歷風霜慣春回雨露生一
經家自學千佛世題名昨夜瞻奎宿寒芒萬丈明

茅簷

茅簷夜雪曉開晴自洗寒衣漉澗清如此過冬何不可
梅花休笑鬢星星

冬半

歲逢冬欲半心事更迢迢細雨寒窻閉孤燈長夜挑遠

書和夢寫新酒帶愁澆明日有幽興尋梅到石橋

挽鮑監鎮

一紙辟書馳華年發軔時排雲何不到殞露遽如斯幼
子未知父偏親反哭兒有書來謁此忍淚看埋碑

送何仲遠適越因之官霅水

樽酒沙頭綠漲波事歡其奈別愁何去程想想蘭亭竹
到日須看霅浦荷年少莫嫌官職小名高却怕薦書多
臘前擬作孤山夢還許扁舟載雪過

簡柳濬卿

一別僅三年相看事宛然旋添新蒜髮猶聳舊吟肩紅
日征途外黃花喜氣邊不須勞寄問姓字有人傳

蒜一作算

秋溪

迎月步秋溪蘆長與樹齊水光連漢近夜氣壓山低岸
隔呼漁渡林疎見鳥棲酒微風力勁歸袖冷淒淒

江湖小集卷二十六

欽定四庫全書

江湖小集卷二十七

宋 陳起 編

王同祖學詩初稿

絕句

京城元夕

已下係
丙申作

鼓吹喧喧月色新
天街燈火夜通晨
玉皇不賜傳柑宴
散與千門萬戶春

湖上

長安三月又三日綉轂狨鞍富貴家笙鼓喧天蘭棹穩
賣花聲裡夕陽斜

偶出城來日未西百花叢底草萋萋遊人過盡歸來晚
行遍蘇公十里堤

送客

千金難買是心知誰遣相親又語違楊柳若知行客恨
不教飛絮撲春衣

太乙宮即事

金殿重重晝不開
盤窠蒼栢兩行栽
角門東畔瞻宸几
仙仗曾迎翠輦來

綠陰密處著危亭
佳氣葱葱王武林
一片紅塵飛不入

杜鵑啼處白雲深

亭後有山
乃武林山

夜步內門

靜夜孤燈人未眠
等閑行過內門前
一聲唱徹連珠喏

皇城夜間
唱連珠喏
碧月朱欄綠柳邊

時事感懷

壯心如鐵氣填膺萬里中原未息塵一枕西風兩行淚
封疆誰是死綏人

羽書昨夜下長安萬騎駸駸犯蜀關愁殺閨中年少婦
朝朝空望戍夫還

襄州蹀血荊州亂千里金湯狐兔憑未定樊城關某死
漢民何日見中興

蜀又交侵淮又危江湖風浪沸潢池

時江右有寇警

連朝雲氣

濃於墨想是英雄血戰時

晚秋

世變無窮客恨長
欄干遍倚怕斜陽
滿籬黃菊無心看
付與游蜂自在忙

明堂觀禮雜詠十三首

尚書省觀涖誓

中辛眡吉建齋壇
宰相前期誓百官
尊祖敬宗天子孝
儀文莫作等閑看

端門觀習肆赦儀

百官常服拱端門丹鳳銜書下九閣宰相近前宣授了
齊班舞蹈謝君恩

兩邊黃幕護朱簷中貴當頭候捲簾扶起金雞爭搶取
要教天表庶民瞻

車駕宿太廟

金甲重矛兩內臣塔前對立氣英英巡更場內知誰問
聽得傳呼宰相名

車駕回太廟

瑞靄祥雲傍晚開
九重法駕太宮迴
一聲靜蹕千官肅
衛士傳呼御座來

天街夜步

風不停雲月更清
千門繡幕笑歌聲
御營巡檢無拘束
走馬天街夜達明

內前

青帷朱簾柳陰旁
玉磬金鍾列兩行
輦路旋添泥細細
雞竿揭處瑞雲黃

和寧門觀駕

星斗中天夜向晨
寸雲不點月華明
六飛過盡燈如晝
宮漏遲報五更

肆赦

九重夙夜畏天威
何事晴明一夕非
不放明堂大朝賀

盡拋坊樂獨行歸

上天變免
朝賀及迎樂

觀景靈宮恭謝

聖皇宗祀懷多福
恭謝回來看帶花
祝啟笙鏞齊合奏

舉頭更見日光華

時積陰
初霽

膳羞進徹靜無譁
宰執齋宮坐賜茶
不比常朝添覆奏

帝朝除目覆奏而
后出劄惟齋宮免
報來除目十餘家

回龍橋望駕

回龍橋上望龍顏
毅采英英仰視難
須信吾皇自神武
何憂中國不尊安

兩行衛士錦宮袍
萬歲聲長徹九臯
過盡羽旄風細細
彩雲不動御爐高

晚秋登樓

獨上危樓望落暉
昏鴉歸處遠煙微
湖光洗得秋容淨
爭奈江南鴈又飛

讀罷黃庭倦倚樓
亂雲挾雨過湖頭
年來無復登臨思
閑撚黃花送暮秋

觀雨

蕭蕭疎雨逐斜風
三兩歸鴉暮靄中
看到菊花無可看
一年秋事又成空

送劉方石歸盱江

歲云暮矣始成行
珍重劉公半月程
四海干戈風物改
亂離時節別離輕

昨日新聞未忍聽
憂時贏得鬢毛星
歸休高卧西江上
祇恐川原草木腥

與月船周君話別

明日須知子遂行
一燈對話過三更
離魂已逐歌聲斷
清夢空隨夜雨生

鳴爐煙冷夜窻寒著盡冬衣尚怯單
忽憶故人千里別
鴈賚芳恨度扶欄

霜風

一夜霜風動地寒
塞垣火未報平安
嫦娥亦帶傷心色
為照征人尚抱鞍

夜坐

獨對寒燈客夢孤
數聲征鴈下平蕪
古今多少難言事
笑指梅花解語無

坐到中宵未忍眠，祇今身世兩茫然。
悲歡轉眼俱陳迹，休對寒燈說舊年。

寒夜

匝地陰風黯淡天，怯寒時候只宜眠。
氈裘羔酒非吾事，自碾新茶和雪煎。

風收雲捲月當天，獨立中庭思悄然。
市井不知邊塞事，嗚嗚鼓吹樂新年。

寄詩人

憶君夜夜看燈花暗數歸期未到家兒女團樂生計足
還知邊塞走胡沙

恰回午枕自華胥忽得周郎一紙書江上春風能幾日

莫教門外柳蕭疎

周留詩為別有歸去門前栽
柳樹逢春先綠向陽枝之句

觀錫宴宣勸

中使傳宣內裏來輔臣拜飲九霞杯君王萬歲三邊靜
壽域先從塞北開

湖上早行

錢唐門外買湖船霧氣衝雲水接天只有蘇堤金線柳
半籠早日半籠煙

陰夕

恰則晴明天又陰霜風如劍二毛侵淮城夜雪深多少
不見擒吳奏捷音

歲晚即事

矻矻窮年漫逐名不知七日換新正困人天氣濃於酒
賴有梅花喚眼醒

元日

巳下係
丁酉作

一夜東風換斗杓千門曉色雪初消君王已奏平淮雅

猶自謙冲免會朝

時以邊事
免大朝會

雲集衣冠拜紫宸榻前除目報來真君恩先到宮門柳

占得人間第一春

觀宰相早朝

五更三點內門開御路傳呼宰相來天子未明思政理

退朝常是過辰牌

用唐人
進退格

春社

廉纖霧雨四山昏
寂寂茅簷半掩門
客裡不知今日社
偶過野廟見分牘

雨意

春愁如織雨如麻
倦倚吟窻拾落花
坐不忍眠心似醉
悠悠身世在天涯

曠曠重陰晝不分
歸鴉林裏認黃昏
人間春信知多少
但覺輕寒入夢魂

內前

兩桁垂楊護九重翠眉羞畫舊隋宮柔條似怕君恩重
低拂朱欄舞曉風

麗正門開曉色鮮萬絲綠柳御溝邊禁中恐有題紅怨
不放涓流出內前

小立

小立危樓望眼遙晚煙淡處見湖橋梅花落盡寒猶力
留得東風候柳條

湖上

湖頭春水千丈碧
湖堤嫋柳不盈尺
唱歌女兒棹船回
驚起沙鷗對對立

廟山道中

蕭蕭疎雨點孤蓬
舟子招呼語順風
小麥青青春恰半
一犁江上看田翁

春日雜興

迢迢清夜靜無譁
月色千門噪亂鴉

吳山月明
則鴉羣噪

坐久忽

驚寒力重不知殘雪在梅花

粉牆紅杏半離披春滿人間花自知幽鳥不言如有思
等閑飛上海棠枝

輕寒漠漠雨霏霏春院人閑半掩扉風力不知多幾許
出門只見杏花飛

百花時節燕鶯忙晝日如年懶課香午枕夢回人悄悄
一聲啼鳥傍斜陽

清明過了柳花飛簾外萋萋草正肥喚起惜春情緒處

空山殘月杜鵑啼

嚴陵舟中

萬水千山霽色新
臨風一葦捷於神
羊裘灘下休停棹
聞說狂奴解笑人

郊行

牧牛童子坐田頭
摘草簪花兩兩謳
路繞青山山遶澗
殘蟬夕照澹於秋

火雲散盡晚風涼
曲澗流空草自長
蠶箔成絲秧貼水

數聲布穀為誰忙

午牕

破午幽禽驚客夢
隔牕疎雨喚離愁
浮雲得喪知何益
早悟莊周蝶夢休

獨行

終日長廊獨自行
幻身未信一絲輕
自家心緒忡忡急
枉恨隣牆搗練聲

初秋

晚趁涼颺上小樓忽看梧葉始驚秋悲懷無奈狂風雨
數盡歸鴉懶轉頭

晚登層樓

已下四首往
金陵鎖試作

西風吹我上層樓千載興亡逝水流數點鴉歸江浦晚
一聲鴈過塞垣秋

天津橋

橋在行宮前昔人謂山如
洛邑水如灑澗因以名之

行闕千重鎖暮烟山如洛邑水如灑黃塵障斷中原路
忍立橋頭聽杜鵑

晚出昇州門

晚驅羸馬出東城
過盡三崗路却平
村店夜深人語靜
隔橋風遞暗潮聲

京口

晚風來候過淮舟
閑上南徐多景樓
落日寒城伴荒草
江南人指是瓜洲

道間晚景

斷橋流水涵虛碧
遠岸空山鎖晚青
勒馬回看溪畔景

森森古木暗長汀

題鄭雲谷梅牕

匆匆歲月為誰忙
靜倚梅牕到夕陽
老菊不知秋已去
晚風時送短籬香

愛梅來訪小春花
閑卧雲房避俗譁
喚醒昏昏塵世夢
旋移石鼎煮新茶

歲晚雜興

撥盡寒灰恨轉添
不知片雪點疎簾
梅花帳冷爐烟歇

架上黃庭信手拈

時勢危棋局轉低丈夫有志竟何為優游輸與田家樂
問著朝廷事不知

雨雪霏霏歲又除鯉庭目斷數行書銷金帳下羊羔酒
便學麤人也不如

夏日金陵制幕即事

已下係戊戌以後詩

五更三點造轅門了却文書日又昏出入戴星吾豈憚
要須一飯不忘恩

蚤來留得氣清明
吏捧軍書課日程
秉燭攬先書押了
閑歌涼枕數殘更

荷花池畔竹涼床
一枕閑消夏日長
燎過水沉天正午
旋移小艇採蓮房

幕府人才不在多
同寅難得是恭和
一堂賓主春風裏
剩有工夫到切磋

入夏邊烽漸報安
不妨拄笏共觀山
西風易把江濤湧
整暇規摹肯放閑

郡圃觀白蓮

翠蓋亭亭映玉裳
臨風綽約暗飄香
六郎正被繁華困
不愛濃粧愛淡粧

嬌羞處子臨粧後
淡淨佳人出浴時
無語倚欄如有恨
生嫌別岸污臙脂

掩畫嬌春歛恨濃
蓮包欲實又成空
都緣不肯為雲雨
開落非關一夜風

採菱人散夕陽收
冷落西溪風露頭
飛入白鷗花一色

暗香來處月如鉤

泰華根株本一同何分白白與紅紅半池只怕霜風倒

輸與蒼顏百丈松

秋日金陵制幕書事

幕府秋來事更多夜深猶自擬諸窠

制闡諸窠大則曰房小則曰窠蓋倣

朝廷之制平安號火新來急北騎連宵已渡河

點盡官軍點到民三千新遣殿司兵流移更講關防策

預結強丁戍列營

流民強壯預為未然慮置勇士一軍團結之

金史卷之二十七
卷二十七
哨馬紛紛一水間渡頭分戍要防姦可憐生計漁舟者

官給旗牌禁往還

諸渡遣官戍之以為禁姦之防至於漁舟亦自官給黃旗黑牌以考驗

元帥謙謙盡下情麟堂垂晚更延賓遇風盡是同舟客
肯把秦人視越人

明朝玉帳過江邊騎卒行營一日先出得公庭天向夜

通宵又散起家錢

元帥江行騎卒遣幕中通夜散起家錢於諸營

秋閨

西風昨夜到庭梧曉看窻前一葉無秋月照人眠不得

等閑拈弄綉工夫

滿目淒涼只自知閒將心事寄琴徽無情梁上雙雙燕
帶取秋光一半歸

入秋情思可曾忺深鎖朱扉怯捲簾書几無人塵不掃
一鈎蛛網掛牙籤

江南賈客去忘歸撲面邊塵自在飛想得那邊寒較早
夜來密地翦征衣

零露瀼瀼夜氣浮嫩寒差力五更頭隣鷄啼破交加夢

冷浸梧桐月一鉤

冬日金陵制幕書事

督制堂堂兩重臣駐師移府夾江濱
資糧屝屨多多辦更有舟車乞與鄰

時督制兩閩移屯江岸應援淮城東閩亦自維揚提兵會合軍需等物多

本司貸之

官軍聞說定廬州破敵功成一滴油

一滴油弩名

智勇功名

付元凱王三錫命到康侯

此詩為合肥作敵以重兵二十萬圍城者四十餘日制帥

杜公於援兵未至前不動聲色而破之父子俱奏雋功受上賞

城中守將方投死陣面將軍已賣降版築紛紛成底事

那知靠後是長江

此詩為滁州作敵圍滁州幾兩月守臣陳廣極力挫之敵已有退志會援

師築城於江壩未進廣中傷死有內變敵遂入而城亡矣

薄晚官軍得勝歸家家戶戶掛旌旗陣前紀律明於日

師入城來半不知


此詩為往來過軍作

三五同寮出幕遲公餘終日意怡怡歸來又被梅花惱
撥冗銅彝插數枝

右七言絕句百首同祖少作也少作不止是雜

體凡數百未敢錄姑錄此百篇為初稿非錄詩也錄其事也詩因事而作事由詩而著不然少作何敢傳哉同祖自髻鬪侍家君宦遊弱冠入金陵幕府目所觸意所感寓於詩詩不足錄事不可廢此初稿所以出也孔子曰小子何莫學夫詩又曰非求益者也欲速成者也同祖慕聖門學詩之訓將以求益而非敢蹈欲速之戒遂以學詩名其篇嘉熙庚子月正元日金華王

同祖書於建安郡齋



欽定四庫全書



江湖小集
卷二十七

大

江湖小集卷二十七

欽定四庫全書

集部

江湖小集卷

二十八至
三十一

詳校官中書臣張姚成

助教_臣常循覆勘

覆校官主事_臣龔敬身

校對官助教_臣胡子襄

謄錄貢生_臣李 燾

謄錄舉人_臣李 椿

欽定四庫全書

江湖小集卷二十八

宋 陳起 編

陳起芸居乙稿

安晚先生既以丹劑四種古調謝之

陳子一畝宮居來七十年當其春盛時庭花發幽妍
轉矚長養天青子垂簷前秋收備百禮冬享意則虔
年來風雨凌垣倒壁四穿上漏下卑濕敗隙遙瞻天
三生結施仁覩此殊興憐捨以四條柱俾之撐危
顛工師得大

木裁製精且專尚欠櫨與楣况復棟與椽再干大檀越
結此歡喜緣

履齋先生下頌參附往體以謝

有客號奚毒西來自赤水外負炎炎氣內存溫粹美當
年楊天惠夸大不絕齒解后段氏子即之殊可喜卻邪
迺素心調中古無比世仰大醫王民瘼咨朝市二子願
托身赴湯任驅使興憐維摩老遣前護衰毀病魔亟退
舍怡然得安壘緬想蓄牛溲陋哉子韓子既非瞑眩劑

厥疾無瘳理一念衛生恩百拜額加指

友人新息滿月

蘭砌懽傳書種子寶刀剃髮月初彌絕憐雅致高於俗
點易殘朱抹顛兒

汎湖紀所遇

六橋鶯花春色濃十年情緒藥裹中筆牀茶竈塵土積
為君拂拭臨東風可笑衰翁不自忖少年場中分險韻
畫舸輕移柳線迎侈此清遊逢道韞銖衣飄飄凌綠波

翡翠壓領描新荷
雍容肯就文字飲
烏絲細染還輕哦
一盃絕類陽關酒
流水高山意何厚
曲未終兮袂已揚
一目歸鴉噪棲柳

賀友人絲桐復歸

春到牡丹花事闌
惜春約客遊湖山
烟光萬態屬吟思
白石清泉流指間
雙成解后蘭舟駐
索紙大書春草句
成此風流一段奇
樂事百年能幾遇
薄暮歸來雨濕衣
買舟庇此十三徽
小梢愚悞阻人意
客散河梁燈火微

方將清事夸兒婦桐君羽化無何有一壺千金何處尋
愁絕瓠巴無錯手要知煩惱所根株以愛布種上當莖
除趙璧既返懼如初哦詩稱賀敢後歎

適安惠糟蟹新酒

偉哉無腸公橫行占江湖幾欲肆其雄上山攫於兔無
端四五輩懷椒尋酒壚枕藉糟丘下醉魂呼不甦尚想
橫戈勇胸次與世殊開懷風味佳大丹液膏腴此寶君
所儲何為貽老夫麴生挾之前爛然陳座隅當其左持

螯不知竭此壺醕酏無何鄉軒冕不關渠東望歌老號
前溪梅影疎

題適安清湖寓居

薰風軒檻曉晴開鬱鬱桐陰手自栽二水合流當戶過
一山分影入樓來琴逢良夜時揮弄詩欲名家巧剪裁
可羨一廛安所適紛紛車馬汨黃埃

燈花戲簡西隣

西隣逸韻偕秋清瑤琴曾許月下聽神馳吟境日復日

金飈轉矣寒此盟昨夕相逢再有約六花飛時湖上行
短檠不密泄此意輝煌粟粟攢金英闕堂一笑前未覩
信手閑閱燈花經一主飲席設林麓一主盃簪獲良朋
便欲箋天檄滕六銀盃逐馬快此情曉來喜見萬瓦白
乃是天宇清霜明得非分去聲薄誤燈花還復燈花戲老
兀

武元惠藥

昔人饋藥不敢嘗未達寒溫良毒旨朝來剝啄客問病

寶齋盈奩意何侈便當三咽答殷勤兒欲先嘗還且止
平生結交結以心豈有鳩人羊叔子多君相濟義薄雲
友道綫絕今振起綠陰庭院趨清和抖擻精神迎藥喜

秋懷

又見街頭賣紫菜老懷擾擾類催租客來喜得吳江紙
欲寫新吟一字無

懷三山友人

春前深惜別病後政無詩青又生菱角紅應熟荔枝魚

甘賓席暖風逆客帆遲徒結連宵夢郵音負所期

寄彭勿庵

一片巴江月移輝到庾梅孤山春事早疎影望東回

以仁者壽為韻壽侍讀節使鄭少師

丙午

一氣妙磅礴萬彙屈者伸方寸函太極宇宙皆吾仁端
平政化絃真儒手洪鈞厥今扶公道皆昔夾袋人丙午
成樂歲甲子無窮春

岩堯閭闔雲蹀躞繡鞍馬細氈侍珠璣治道談帝者歸

來西湖濱岸幘松蓋下秋渌晚涵山揖以薦殘筭北第
何三辭泉石懷綠野

賦詩投金瀨俸入猶半有輝煌奉國節一粟乃不受贏
副初何心國計要豐阜一丸濟世德陽報期千壽會須
煩潞公再與佐元祐

枕上

病與仇謀酒作成藥爐又復伴深更隣鐘自是常時聽
纔到霜天分外清

郭聖與黃希聲問候

山有靈芽可點金，名醫未遇苦為尋。
藥房掩書情多感，竹榻逢秋老不禁。
座上遍將唐帖揭，架中閑取晉詩吟。
病懷得此相料理，更接蘭交問訊音。

過三橋懷山臺

賣花聲裏憑欄處，沽酒樓前對雨時。
景物如初情自老，夕陽波上燕差池。

題玉泉畫像次來軸韻

六言

鹿隨寒策穿雲遯
迓靈峯時節含毫誰
貌閑情莫畫胸
中風月

奉酬竹溪陳史君新詩墨梅之貺

千里雙魚賁草堂
中藏瓌異夜騰光
興因東閣增懷想
影落前榮不寄香
四韻休誇毛穎伎
幾回曾誤壽陽妝
感公意過兼金
餽慚乏瓊琚
展報襄

壽大丞相安晚先生

巳酉

嵯峨補陔山下視
海水流風波定以
梢穩穩濟川舟皇

穹祐炎祚黍稷慶有秋緊誰致此祥上相今伊周赫赫
命世賢師道輔前旒暨湯同格天康濟仰廟謀向來三
邊塵化作和氣游橫戈枕月戍擊壤歌西疇小春明日
是泰階射斗牛見說老人星交曙光九州宣勸下紫宸
雕盤羅珍羞北禁詔墨香昌熾頌魯侯鰕生戴厚恩一
詩何能酬擬辦八千首從今歲歲投

紙帳送梅屋小詩戲之

十幅溪藤皺縠紋梅花夢裡悶氤氳裴航莫作瑤臺想

約取希夷共白雲

迎月

尊酒貪迎月人生醉後嘉夜來
窻不掩吹落一瓶花

止酒示圭

一病杯中物致危翰林何事酷耽之
酒經若果通仙道不向青山立斷碑

適安有湖山之招病不果赴

蘭契簡以詩金鏗而玉憂
招邀訪逋仙劇飲擬投轄事

有違人意十常居七八文園病政濃况復泥濘滑老懷
欲舒散天心若是恣

適安和

人生欲四并其難乎憂憂春工鬧花柳春露阨車轄何
當載酒歌對舞花十八樹色尤綠秀鶯聲尚圓滑作詩
調維摩病安情已恣

槐隱和

新篁褪錦衣風玉漸相憂香紅吹成塵春去誰管轄歌

酒相留連一笑携二八
敗意林間禽饒舌泥滑滑可人
非不來正坐天意恚

輓梅屋

桐陰吟社憶當年別後攀梅結數椽
湖海有聲推逸韻
弓旌不至笑遺賢
兒收殘稿能傳業
自誌平生不愧天
航便雙魚無復得
夾山西望淚潺湲

輓林夫人

劉後村母

懿德遐齡世所尊
濃薰班馬到諸孫
疏榮花誥加宏邑

賜第蘭堦侈異恩了了三乘言外趣如如一性定中存
魚軒應向西方去知在蓮花第幾根

病中偶成

平生謹樽酒投老更齊聖優游接嘉賓能使百憂屏可
憐陶士行飲少亦致病豐下改舊容浮采滿青鏡升降
氣失常醫經云上盛亟試黃昏湯要期勿藥慶朝來覺
清爽臨窻發幽詠

薄命

薄命畏庚金那逢闍茂臨一樽花下飲半載藥邊吟食
味同玄酒形骸類槁林但存元氣在會見綠成陰

消遣

夜雨生寒換夾衣形臞貌悴嘆衰遲病中何物能消遣
一榻揩摩十載詩

題西窻食芹稿

曾味西窻藁經年齒頰清細評何物似碧澗一盃羹

一念

一念無塵雜三更有夢回同他石橋老過水探寒梅

買花

今早神清覺步輕杖藜聊復到前庭市聲亦有關情處
買得秋花插小瓶

一榻

一榻世緣輕毋將事物縈昔人言豈誤慧自靜中生

同清兄看猿

藜杖同僧扣磨門野叟閑放他猿摘果莫把白雲關

薄暮

寂寥誰作侶耿耿一寒缸薄暮西風急呼童掩却牕

秋夜懷康節

無眠輾轉聽更殘心緒如絲起萬端煎藥爐邊童夢曉
讀書檠下婦紉寒狻猊斷火香猶婉促織摧秋袂怯單
願子大賢康節語此情於我一般般

冷泉凭欄

此山泉石勝還思日日登那知三生前不是住山僧

冷泉邂逅友人留飲

倦叟尋芳藉短筇故人邂逅一樽同
明霞浸水疑鋪錦彩閣橫溪儼卧虹
猿去復歸啼曉嶂僧來相伴立春風
雪濤湍激開寒閘滌盡塵襟萬慮空

黃路鈐詩來告別

玉泉馳一紙八韻有情詩不肯面相別
恐成離索悲江聲噴岸拆潮勢激帆危
舊制邊州守方今典轄司

適安招遊湯鎮不果赴

湯鎮古祠宮招邀及倦翁輕裘乘曉月駿馬逐東風野
色觀無分春光病見攻行將迎誕日一瓣擬遙通

寄東齋

又復逢初度疋羸異昔時預愁臨丙戌所願值天醫剪
綵裝茶菓裁牋薦壽卮今年都告免湯餅却相宜

寒吹

寒吹西軒入呆思設座隅腰圍同沈約指爪類麻姑靜
卧羶三疊清齋飯一盃曉來香滿室巖桂倚餅鑪

適安夜訪讀靜佳詩卷

情同義合亦前緣得此蘭交慰晚年
旋熟古香延夜月
試他新茗瀹秋泉君停逸駕談何爽
客寄吟編句極圓
可惜病翁初止酒不能共醉桂花前

所適

釣鼇東海頭經春醉一舟
西溪拘留人小鮮終日求

庚戌秋作

甲辰迤邐至今年藥竈殊勞日夕煎
血氣任他銷與鑠

向來詩骨已成仙

耘業許印章四韻叩之

近因稚子傳來意知許衰翁兩印章字畫莫教凡手刻
形模當取古人長六書今獨行秦嶧三體空聞設漢庠
後世陽冰能復古未知何日寄文房

婚嫁

婚嫁債羈縻何時是了期每嗟身外累無出女和兒聽
漏寒無夢添香夜有詩沉沉澄萬境梅影月初移

六言簡耘業

露濕螢光愈熾月斜蛩韻尤清
微物得時若此人生可不求名

束起

束起仙翁肘後經旦參思邈枕中吟
夜來獨卧寒無寐憶殺黃紬舊破衾

聞隣寺粥

寒缸旋擗動冥搜泓玉摩研萬象愁
鐵版響廊催早粥

銅壺添水易新籌一聲鷄唱驚殘夢再聽鴉羣過小樓
可惜秋光惟帶隔料應河漢五更收

汪夫人筵上口號

今朝王母讌西池葱蒨祥烟靄繡帷坐摘蟠桃華壽席
行看丹桂發孫枝魚軒錦轂花千疊鸞誥金鈴絡四垂
好是慇懃千歲祝老萊先酌後門楣

脩然

向來蓮社本遺榮勾引淵明造道場梵葉翻殘空佛印

念珠持久現圓光
秋花依約生涼意
暑雨微茫送夕陽
客退飯餘無箇事
翛然一枕到羲皇

風雨作

無成老見過望望
太平歌驚雨愁
扃戶聞風慮偃禾
盃中醇止久瓶底
粟無多畎畝憂
時切天乎少警何

葵憲送酒

久藏斗酒謀諸婦
婢子倉皇錯授醯
邂逅芸居初止酒
小厨海錯旋開泥

望曉

要知筋力衰多少一覺纔回常了了
隣鐘無奈五更何
望斷窻紗不能曉

湖上即事

波光山色兩盈盈短策青鞋信意行
葑草烟開遙認鷺
柳條春早未藏鶯誰家艷飲歌初歇
有客孤舟笛再橫
風景無窮吟莫盡且將酩酊樂浮生

朝宗餽食且復招飲

相親逾骨肉何以結情深下箸覺可口同盤還上心撥
灰君句就曝背我寒侵屢有梅憲約行將共晚斟

送印寒鄧簿得闕西歸

才藻世於家勾朱新職華學能如執木春到可生花野
店寒吟月輕裝曉度沙君行余止酒一念一興嗟

印寒取山

谷題仁亭詩執木印歲寒云

圭示急須制作亭當喜成一絕

博古圖中無此樣繫誰匠意巧胚胎槐堂新送黃封酒

便可衝寒煖一杯

梅花怨為汪耘業賦

庚戌

噤崢歲事春將至寂寞梅花雪失期
獨有垂楊伴幽怨
豈堪臨水折長枝

舊題隱者壁一絕

妻嗔山犬踐園蔬兒釣溪魚餒鶴雛
總道村居無外事
有人庭下索詩逋

酬成賢良

夢

獻璞無成喜弄璋
世間得失事相參
劉蕢不得言時事
半為當時記樸庵

同友人汎舟過斷橋登壽星江湖偉觀歸舟聽
客謳清真詞意甚適分得江字奉寄季大著鄉
執蕪呈真靜先生

辛亥仲春將徂兮有客踵門曰風日流麗邀余共泛西
湖之舫

皮江切

舫南去而忽西兮昨之折檻今復飾以成

杠背蘇堤蕪絲之綠陰兮望一簇孤山之青幢

傳江切
層

峯疊嶂巉絕露天巧珠英琪樹發越地之靈一聲何處
分鍾撞篙師告余曰此壽星古刹上有奇觀開宇宙於
八憲捨舟策杖步步巍巍謝屐殊勞雙回廊曲轉忽軒
豁檐飛棟複青綠交輝心開目駭而揖西子之湖子胥
之江觀者雜還儵去儵來余獨凭欄境與心會便欲馭
風跨蜿蜒胡江切煙雲萬態客擬狀而運思羿今老退且
遜銳逢莊嚴世界合爪讚嘆要使天下名山夸詠者睹
此奇偉而心降風寒下山吹欲倒連呼春酒亟開缸簫

鼓畫船徒自紛耳目何如美成清絕按新腔詩成肯對
俗子哦馳介城南寄老龐

舊輓汪隱君

汪守泰
亨父

栖志浮雲小萬鍾帶經高壟度春風義方莫問當年事
十五男兒識阿戎

又

遺碣鑽辭掩夜臺修文空嘆逞餘才鹿坡明月成惆悵
不見高人自往來

靜江商宰書來且索鄙語要道其冰雪相看之
意古調代書

連牆不通問千里乃寄音平生於締交淡泊味最深吳
山青插天應同碧玉簪尚憐風馬牛睽若商與參一聲
南來鴈西風又相尋君其念衰朽余亦懷瑤林一庶了
官事吟外時鳴琴識量萬頃陂文華寶南金向來唐相
璟疑事問崔琳諸臺貴得賢而肯捨此琛會晤喜有期
寬此離索襟

安晚先生送自贊太上感應篇帙首御題諸惡
莫作衆善奉行八字輔以佑聖像一軸兩詩見

意云

公袞殊相念竒書寄布衣此心纔動處萬善要同歸本
旨詳敷衍奎題重發揮應憐遽伯玉投老始知非
稽首元真像當年助我軍龜蛇俾聖武龍鳳煥奎文劒
聳燒空焰旗翻渡海雲上公傳琬琰分惠感慇懃

雜言送歛硯廣香與友人有懷楊校書

幼度

我有龍尾雙槽之硯肌潤而若沐涇濛舊藏古香氤氳
來自廣之東多君博雅舉以為贈三嗅而抹月批風要
若鎔金加萬佛經上更須滴露點四聖書中往昔濃薰
懷太史而今一瓣為南豐藜光下照人何在閣下閑花
馥舊叢

真靜饋新茶菰乾黃獨乳酪約葵窻適安共享
適安不赴葵窻詩來道謝次韻答之兼呈真靜
適安

千載靖節翁秫向公田種萬鍾於我何肯戀五斗俸長
歌歸去來田園聊自奉高蹈世莫儔器局小管仲嗟余
昧於時退思心每痛世人不我知小畦親抱甕唯有竹
宮仙時復致一供四清山中珍凡目為之動黃獨前未
識勿謂仲宜慙春茗摘新芽秋菰懷舊葑江南貴乳酪
此意兼金重得君同下箸詩來再三諷韻意兩相高文
史嘆足用續貂愧狗尾敢與賢者共語奚較工拙年來
此心縱軟飽黑甜餘無復春草夢可人招不來屬篇亟

持送

哭丹池王隱居

憶昔相逢初一見，即刮目出處雖不齊。
椒蘭則同馥，論心到極處情愛踰。骨肉十年傳成癖，
搢閉門讀高志。尊所傳而肯曲從，俗抱此
竒特操平步可金玉。况復同憲友，槐庭秉
鈞軸。事有反所料，軒冕笑羈束。縉雲邈
千里，訪道求辟穀。食棗懷安期，竊桃小方
朔。平生精進心，自可登仙錄。一著偶失筭，
九書無復續。洞霄有猿號丹

池無鶴浴昨病失會葬生芻東望哭

寄汪起潛簽判

飛雲起伏龍大鵬運以風風雲一朝會前塞今乃通歛
翼賢景略時哉使其逢腰錢與騎鶴事或有適同青門
瓜吹香綠水蓮泛紅人物王謝家風雅眼底空參畫聳
臺府宜護碧紗籠鄱江萬折東獨鶚摩蒼穹浮圖快一
擲歸騎先賓鴻

史記送後村劉祕監兼致欲見之悰

昏瞶嗟耳目管絃堂上調世事每相背秋月虛良宵涓
吉擬登龍疾雨驚風飄襍刺不得前東睇心旌搖近履
傳康強變體筆更饒風響雖時接未若親聞韶憶昔西
湖濱別語請教條囑以馬遷史文貴細字彫名言猶在
耳堤柳凡幾凋茲焉得蜀刻持贈踐久要會晤知何時
霽色審來朝

江湖小集卷二十八